

金石錄

四

金石錄卷第十八

跋尾八

漢



漢成陽令唐君頌

漢唐君碑陰

漢白石神君碑

漢幽州刺史朱龜碑

漢朱龜碑陰

漢都鄉正街彈碑

漢太尉劉寬碑

漢劉寬碑陰

漢...君碑

漢趙杜劉德碑

漢陳君碑

漢陳仲弓碑

漢陳仲弓碑陰

漢陳仲弓壇碑

漢圉令趙君碑

漢周公禮殿記

漢巴郡太守樊君碑

漢綏民校尉熊君碑

漢宗資墓天祿碑邪字

漢司空宗俱碑

漢馮使君墓闕銘

漢高陽令楊君碑陰

漢浚儀令衡立碑

漢光祿勳劉曜碑

漢成陽令唐君頌

右漢成陽令唐君頌云君諱扶字正南字畫尚完而歐陽公集古錄乃云其名殘缺何哉碑額題漢故成陽令唐君之頌在今濮州雷澤縣古成陽也

漢唐君碑陰

右漢唐君碑陰載出錢造碑人有故從事故督郵故吏
處士門生門童等姓名案唐君碑云處士閻葵班等刻
石樹頌而碑陰又有故吏閻葵巴處士閻葵楚閻葵姓
不見于前史而姓苑姓纂之類亦皆不載蓋前代氏族
或因改易或寢微不顯遂泯沒而無傳者甚衆今世所
有姓氏書類多簡略不完惟時時見于石刻者余每記
之以裨姓氏書之闕云

漢白石神君碑

右漢白石神君碑其略云白石神君者居九山之數參
三條之一兼將軍之號秉斧鉞之威體連封龍氣通北

岳幽讚天地長育萬物觸石而起膚寸而合不終朝日
而澍雨沾洽自前後國縣屢有祈請指日刻期應時有
驗猶自挹損不求禮秩縣亦有六名山三公封龍靈山
得法食去光和四年三公守民蓋高等始為無極山詣
太常求法食相縣以白石神君道德灼然乃具載本末
上尚書求依無極即蒙聽許於是遂開托舊兆改立殿
堂其餘首尾尚皆完好可讀文多不備載其曰居九山
之數參三條之一莫曉為何語也

漢幽州刺史朱龜碑

右漢幽州刺史朱龜碑在今亳州鄆道元注水經云渦

水東逕朱龜墓北東南流冢南枕道有碑題云漢故幽
州刺史朱君之碑龜字伯靈光和六年卒官今以碑考
之與道元所載皆合歐陽公集古錄云龜之事跡不見
史傳獨見于此碑尔余按後漢書西南夷傳熹平五年
諸夷反叛執蜀郡太守雍陟遣御史中丞朱龜討之不
能克太尉掾李顥建策討伐乃以顥為益州太守發板
楯蠻擊破平之常璩華陽國志亦載其事與史同惟史
與華陽國志皆言龜不能克而碑云蠻夷授手乞降二
說不同疑碑所書非實錄也

漢朱龜碑陰

右漢朱龜碑陰文字殘缺初余讀酈道元注水經云朱龜碑陰故吏名姓多上谷代郡人知此碑有陰因託人就亳社摸得之附于碑後

漢都鄉正街彈碑

右漢都鄉正街彈碑在汝州界故昆陽城中文字摩滅不可考究其歲月略可見蓋中平二年正月而其額題都鄉正街彈碑莫知其為何碑也

漢太尉劉寬碑

右漢太尉劉寬碑寬有兩碑皆在洛陽上東門外官道傍此碑據藝文類聚乃桓麟撰後碑不知何人所為然

字體則同也

漢劉寬碑陰

右漢劉寬碑陰寬兩碑皆有陰此後碑陰也唐咸亨中碑仆于野其裔孫周王記室參軍爽字元爽重為建立寬以中平二年卒據靈帝紀以光和七年十二月改元中平以曆推之是歲甲子至明年當為乙丑而爽書為甲子誤矣

漢尉氏令鄭君碑

右漢尉氏令鄭君碑云君字季宣聘君之孫而其名已殘缺其他字畫時有可識處皆斷續不成文理略可見

者年五十有七卒于中平二年而碑陰題尉氏故吏處
士人名知其為尉氏令尔

漢趙相劉衡碑

右漢趙相劉衡碑云君諱衡字元宰濟南東平陵人也
厥先尚矣聖漢龍興有下殘缺又云爰啓異土遷于岱
陰自康侯以來奕世丕承又云敦海王帝之冢弟不遵
憲典君以特選為郎中令以兄琅邪相憂即日輕舉州
察茂材除脩令遷張掖屬國都尉以病徵拜議郎遷東
東上闕
一
屬國都尉不行拜趙相在位三歲拜議郎年五
十有五以中平四年二月戊午卒其四月己酉葬其餘

文字完好者尚多按後漢書勃海王名悝桓帝弟也衡
墓與碑在今齊州歷城縣界中古平陵城傍余嘗親至
墓下觀此碑因摸得之墓前有石獸制作甚工云

漢陳君碑

右漢陳君碑文字殘缺不完其略可識者云君諱度字
妙高陳國相人又云武王克商封無伐之後以元女大
姬配胡公至厲公生公子完奔齊其後斷續不復成文
而最後題中平四年九月二十日巳丑立云

漢陳仲弓碑

右漢陳仲弓碑其額題云漢文範先生陳仲弓之碑碑

文字已漫滅蔡邕字畫見於今者絕少故雖漫滅之餘
尤為可惜以校集本不同者已數字惜其不完也按邕
集仲弓三碑皆邕撰其一碑云中平三年秋八月丙子
卒而三碑皆云春秋八十有三後漢書仲弓傳以為中
平四年年八十四卒于家者疑傳誤

漢陳仲弓碑陰

右陳仲弓碑陰故吏姓名多已剝缺蔡邕小字八分惟
此與石經遺字尔石經字畫謹嚴而此碑陰尤放逸可
愛

漢陳仲弓壇碑

右漢陳仲弓壇碑其額題故太丘長潁川陳君壇其他文字摩滅不可盡識按蔡邕集有仲弓三碑以集本校之此碑非邕撰者然字畫亦奇偉惜其殘缺不完也

漢圉令趙君碑

右漢圉令趙君碑其額題漢故圉令趙君之碑而最後題初平元年十二月二十八日立碑已訛缺名字皆不可考所可見者有云郡仍署五官掾功曹州辟從事司徒楊公辟遷圉令播德二城風矍穆清被疾去官年六十有八以中平五年冬十一月卒後有銘詩特完好其辭云天寔高惟聖同戲我君羨其縱體弘仁蹈中庸所

臨歷有休功追景行亦難雙刊金石示萬邦其詞頗不雅故錄之

漢周公禮殿記

右漢周公禮殿記者今成都府學有漢時所建舊屋柱皆正方上狹下闊此記在柱上刻之靈帝初平五年立距今蓋千年矣而字畫完好可讀當時石刻在者往往摩滅此記託于屋楹乃與金石爭壽亦異矣記有云甲午年故府梓潼文君增造吏舍二百餘間按華陽國志有文參字子奇梓潼人平帝用為益州太守不從王莽公孫述光武真之疑此記所載即其人也蓋光武建武

十年歲次甲午云

漢巴郡太守樊君碑

右漢巴郡太守樊君碑云君諱敏字昇達肇祖宓戲遺
苗后稷為堯種封舍潛于岐天顧亶甫乃萌昌發周室
襄微霸伯匡弼晉為韓魏魯分為揚充曜封邑厥土河
東楚漢之際或居于楚或集于梁君續其緒華南西曷
又云總角好學治嚴氏經貫穿道度無文不睹於是國
君備禮招請濯冕題冠傑立忠蹇有夷史之直卓密之
風鄉黨見歸察孝除郎永昌長史遷宕渠令大將軍辟
光和之末京師擾攘雄狐綏綏冠履同囊投核長驅畢

忘枕丘國復重察辭病不就再奉朝聘七辟外臺常爲
治中諸部從事又云季世不祥米巫凶瘡姦狡竝起陷
附者衆君執一心賴無污耻復辟司徒道隔不徃牧伯
劉公表授巴郡以助義都尉養疾閭里又行褒義校尉
年八十有四歲在汁洽紀驗期臻奄忽臧形其後有銘
最後題建安十年二月上旬造他漢碑類多剝缺而此
碑獨首尾完好故載其大略于此所謂米巫凶瘡者謂
張角也

漢綏民校尉熊君碑

右漢熊君碑其名字皆殘缺其額題漢故綏民校尉騎

都尉桂陽曲紅灌陽長熊君之碑初余得桂陽太守周君碑陰據水經注以為曲江漢時本名曲紅今此碑及額亦皆作紅乃知酈道元為有據也

漢宗資墓天祿辟邪字

右漢天祿辟邪字在南陽宗資墓前石獸膊上歐陽公

集古錄按黨錮傳云資祖均自有傳

見章懷太子注

今後漢書

有宋均傳云南陽安衆人而無宗均傳疑黨錮傳轉寫宋為宗爾蜀志有宗預南陽安衆人豈安衆當漢時有宗宋二族而字與音皆相近遂至訛謬邪此說非是余按後漢書均族子意傳云意孫俱靈帝時為司空而靈

帝紀建寧四年書太常宗俱為司空注云俱字伯儷南陽安衆人延熹二年書司空宗俱薨又姓苑載南陽安衆宗氏云後漢五官中郎將伯伯子司隸校尉河內太守均均族兄遼東太守京京子司隸校尉意意孫司空俱元和姓纂所書亦同則均姓為宗無可疑者當章懷太子為注及林寶撰姓纂時尚未差謬至後來始轉寫為宋尔余既援據詳審遂於家藏後漢書均列傳用此說改定云

漢司空宗俱碑

古漢司空宗俱碑云公諱俱字伯儷南陽安衆人也而

其額題漢故司空宗公之碑按後漢書宋均傳均族子
意意孫俱靈帝時為司空余嘗得宗資墓前石獸膊上
刻字因以後漢帝紀及姓苑姓纂等諸書參考以謂自
均而下其姓皆當作宗而列傳轉寫為宋誤也後得此
碑益知前言之不謬碑已殘缺不成文理而官秩名鄉
里特完可考故詳著之

漢馮使君墓闕銘

右漢馮使君墓闕銘云故尚書侍郎河南京令豫州刺
史馮使君神道按後漢書馮緄傳緄父煥安帝時為幽
州刺史而緄碑亦云幽州君之元子此字在宕渠緄墓

煎雙石闕上知其為煥闕也

漢高陽令楊君碑陰

右漢高陽令楊君碑陰歐陽公集古錄云余家集錄得
楊震墓域中漢碑四震及沛相繁陽高陽令碑并得碑
陰題名然得時參錯不知為何碑之陰也集古所有余
盡得之又各以碑陰附于碑後其曰懷陵園令蔣禧字
武仲者沛相碑陰也其曰故吏故民故功曹史故門下
佐者繁陽令碑陰也其曰右後公門生右沛君生者高
陽令碑陰也

漢高陽令衡立碑

右漢浚儀令衡立碑云君諱立字元節其先出自伊尹
而其銘曰於穆從事歐陽公集古錄號為元節碑且云
疑其姓伊而為從事也今碑首尚完題浚儀令衡君之
碑蓋漢時石刻其官爵姓氏既載于額則其下不復更
著苟文已殘缺又不見其額則遂難考究矣立與衛尉
卿衡方墓皆在今鄆州中都方碑亦云其先伊尹號稱
阿衡因以氏焉

漢光祿勳劉曜碑

石

右漢光祿勳劉曜碑集古錄云君諱曜字季尼年七十
三其餘爵里官閥卒葬歲月皆不可見今此碑雖殘缺

然尚有可考處蓋孝文之裔又嘗爲太官令郎中居延
都尉太宗正衛尉遂爲光祿勳至於卒葬年月則斷續
不可考矣

金石錄卷第十八

世世因之

金亦檢卷第... 不復更

金亦檢卷第... 不復更

御衡方基皆在今御... 亦云其先伊尹號稱

阿衡因以氏焉

不曰夫矣漢光祿勳劉... 唯

雅議大... 氏保維

... 氏保維

金石錄卷第十九

跋尾九 漢

漢張侯殘碑

漢荊州從事苑君碑

漢趙相離府君碑

漢遼府君墓石柱篆文

漢永樂少府賈君闕銘

漢酸棗令劉熊碑

漢臨朐長仲君碑

漢蜀郡太守任君神道

漢山郡屬國都尉王君神道

漢司空殘碑

漢益州太守楊宗墓闕

漢益州刺史薛君巴郡太守劉君碑

漢巴郡太守張君碑

漢南陽太守秦君碑額

漢河南尹蘇府君碑額

漢禹廟碑

漢禹廟碑陰

漢司空掾陳君碑陰

漢武氏石室畫像

戚伯著碑

四皓神位刻石

相府小史夏堪碑

郭先生碑

漢張侯殘碑

右漢張侯殘碑張侯者子房也碑已斷裂摩滅不可次
叙獨其額尚完題漢故張侯之碑在今彭城古留城子
房廟中驗其字畫蓋東漢時所立樂史寰宇記陳留縣
有張良墓引城冢記云張良封陳留侯食邑小黃一萬
戶漢為良築城因名張良城今陳留有子房廟貌甚盛

余按西漢書地理志注留屬陳故稱陳留宋亦有留彭
城留是也子房傳曰始臣起下邳與上會留臣願封留
足矣下邳與彭城相近而此碑漢人所立乃在彭城然
則子房所封非陳留明矣城家記誕妄蓋不足信也

漢荊州從事苑鎮碑

右漢苑鎮碑其略云漢故荊州從事苑君諱鎮字仲弓
南陽人也其先出自苑栢何為晉樂正世掌朝朝之制
又云有苑子園寔能掌陰陽之理君即其胄也按姓氏
書皆云苑氏出于左傳所載齊大夫苑何忌之後今此
碑所謂苑栢何與子園左傳國語皆無其人故錄之以

待知者

漢趙相雖府君碑

右漢趙相雖府君碑其前歷叙家世官爵而所述雖君
事甚略云趙國相名勸孝廉感臯令趙國相又云在官
五載莅政清平有甘棠之化年四十五卒于官故吏民
漢中太守邯鄲某等其名殘缺慕戀恩德刊石稱頌焉又
有闕銘題漢故趙國相雖府君之闕云

漢逢府君墓石柱篆文

右漢逢府君墓石柱篆文云漢故博士趙傳逢
府君神道唐李利涉編古命氏北海逢氏有名終字子

繡者爲漢趙王傳其孫萌不仕王莽蓋前漢時人今逢
君北海人又爲趙傳疑其是也而濰州圖經北海縣有
逢汾墓云汾好學以德義聞徵爲博士趙王傳卒門人
執裹經者數百葬於寒亭南四里今此篆文既不載其
名皆莫可考然圖經所載逢君事首尾甚詳不知何以
知其名汾必別有所據又疑絲與汾兩人前後皆嘗爲
趙王傳未可知也故并載之以俟知者

漢永樂少府賈君闕銘

右漢永樂少府賈君闕銘按漢書桓帝母孝崇匱皇后
居永樂宮和平元年詔置太僕少府如長樂故事其後

靈帝母孝仁董皇后亦居是宮歐陽公集古錄引章懷太子注云漢官儀長樂少府以官者爲之則賈君蓋亦官者也余以漢史及石刻考之當時三公如陳球劉寬皆嘗爲此官非獨一人蓋自西漢以來太后皇后官屬如大長秋之類皆參用士人然則漢官儀以爲止用官者爲之蓋其闕漏而集古錄遂以賈君爲官者亦未必然也

漢酸棗令劉熊碑

右漢劉熊碑在今酸棗縣云君諱熊字孟孟下缺一字按鄒道元注水經酸棗城內有漢縣令劉孟陽碑今據

碑熊實爲此縣令然則所缺一字當從水經爲陽也碑
又云君光武皇帝之玄廣陵王之孫俞鄉侯之季子也
按後漢書光武子廣陵思王荆以譴死顯宗封其子元
壽爲廣陵侯又封元壽第三人皆爲鄉侯而李利涉編
古命氏唐書宰相世系表皆云荆生俞鄉元侯平平生
彪襲封今據熊當爲彪之弟然則於光武乃其曾孫而
曰玄孫者疑碑誤

漢臨朐長仲君碑

右漢臨朐長仲君碑文字摩滅其粗可見者云君諱雄
又云歷郡五官掾功曹史辟從事舉孝廉除郎中遷臨

胸長而其額題故臨胸長仲君碑云

漢蜀郡太守任君神道

右漢蜀郡太守任君神道九字字畫壯偉然不著名字鄉里歲月莫詳其為何人也

漢蜀郡屬國都尉王君神道

石漢王君神道在南陽云漢故蜀郡屬國都尉王君神道封陌按酈道元注水經濟水南道側有二石樓制作精妙題言蜀郡太守姓王字子雅南陽西鄂人有三女無男而家累千金父沒當葬三女各出錢五百萬一女築墓一女建樓今此碑後有唐向城令張璿之撰孝女

雙石樓記所書與水經注合惟水經誤以都尉爲太守耳璿之記天寶七載建別錄于後

漢司空殘碑

右漢司空殘碑政和乙未歲得於洛陽天津橋之故基首尾已不完所存四十五字字畫竒偉其詞有云命尔司空余回尔輔據此乃嘗爲三公蓋當時顯人惜其不見名氏也碑陰有故吏題名百餘人尤完好筆法不減蔡邕石經云

漢益州太守楊宗墓闕銘

右漢楊宗墓闕銘在蜀中凡十六大字云漢故益州太

守揚府君諱宗字德仲墓闕汶陽李長茂爲蜀使者罷
歸以此本見遺長茂名公年東州善士以畫山水著稱
者

漢益州刺史薛君巴郡太守劉君碑

右漢薛君劉君碑已斷裂不完惟存上一段而其額尚
全題漢故益州刺史中山相薛君巴郡太守宗正卿咸
平侯相劉君碑古無兩人共立一碑者惟見于此尔

漢巴郡太守張君碑

右漢巴郡太守張君碑其前題巴郡太守都亭侯張府
君功德叙云君諱訥字子郎勃海南皮人也又云炎漢

龍興留侯維幹校齋滋布竝極賈秩又云察孝廉除郎
中尚書侍郎遷甘陵寃句令親病去官辟司空司徒府
復辟太尉舉高第拜侍御史揚州寇賊陸梁作難五府
表君中丞督捕又云丙子璽書封都亭侯碑無卒葬年
月其後頗叙述政績而繫以銘詩蓋巴郡太守德政碑
尔按漢史自安順以來揚州寇賊屢發不知張君為中
丞督捕在何年也

漢南陽太守秦君碑額

右漢南陽太守秦君碑額文字已摩滅惟其額十大字
尚完好故名字歲月皆莫可考按後漢書靈帝紀中平

三年二月江夏兵趙慈反殺南陽太守秦頡或云此即
頡碑也然酈道元水經注載頡墓與碑皆在宜城此碑
乃在南陽或是郡人所立德政頌尔

漢河南尹蘇府君碑額

右漢蘇府君碑額題漢故河南尹蘇府君碑今宣州太
守張叔夜嵇仲見寄云在許州道傍碑無文詞惟此十
字其額尔按東漢時蘇氏最顯者惟蘇章嘗以河南尹
徵不就其他無尹河南者意其為章碑也然章扶風平
陵人而碑乃在許昌未知果是否

漢禹廟碑

右漢禹廟碑字畫淺細故摩滅尤甚其事跡歲月皆不可考略可見者云皮氏長安定蘇而名字亦不能辨矣

漢禹廟碑陰

右漢禹廟碑陰自侯長汾陰趙遺子宣而下凡數十人姓名官爵具存又有故督郵曹史縣功曹鄉部吏栢昱等人名最後有龍門復民三十五戶人名在金龍門禹廟殘碑之陰而集古錄云在閔鄉楊震墓側又云楊氏子孫當時皆葬閔鄉碑碣徃徃摩滅此不知為誰碑者蓋誤也

漢司空掾陳君碑額

右漢司空掾陳君碑額碑已殘缺不可辨惟其首八大
字尚完字畫竒偉在潁川陳太丘墓側按後漢書太丘
傳載二子紀諶紀為大鴻臚諶不著其為何官惟劉孝
標注世說引海內先賢傳曰諶字季方寔少子也司空
掾公車徵不就蚤卒然則斯碑豈非陳諶碑乎

漢武氏石室畫像

右漢武氏石室畫像五卷武氏有數墓在今濟州任城
墓前有石室四壁刻古聖賢畫像小字八分書題記姓
名徃徃為贊于其上文詞古雅字畫遒勁可喜故盡錄
之以資博覽

戚伯著碑

石戚伯著碑首尾糜滅其略可見者有云充列王室遇
謗于呂委位捐爵而其額題周末嗣戚氏襲以興勃海
君立孫伯著之碑知其姓戚以文詞字畫驗之疑東漢
中葉以前人蓋當時石刻見于今者多類此所謂充列
王室遇謗于呂者戚夫人也

四皓神位刻石

右四皓神位神胙几刻石四在惠帝陵傍驗其字畫蓋
東漢時書按顏師古匡謬正俗引圜稱陳留風俗傳自
序云圜公之後圜公為秦博士避地南山漢祖聘之不

就惠太子即位以圜公為司徒自圜公至稱十一世按
班固述四皓但有園公非圜公也云當秦之時避地入
商洛深山則不為博士明矣又漢初不置司徒安得以
圜公為之乎稱之說實為鄙野余嘗疑稱著書自述其
世系不應妄誕如此又得四皓刻石見其所書亦為圜
公乃知稱所述果非臆說蓋當時所傳如此尔至謂圜
公為秦博士及惠帝時拜司徒者疑無所據

相府小史夏堪碑

右相府小史夏堪碑云夏堪字叔德帝禹之精苗零陵
太守之根嗣也後有銘終三字語頗古其卒葬年月殘

缺字雖不工然漢碑也其曰精苗根嗣漢末人為文喜
造語多類此

郭先生碑

右郭先生碑集古錄以為漢碑按後魏酈道元注水經
具載此碑云碑無年號不知何代人然則歐陽公何所
據遂以為漢人乎余以字畫驗之疑魏晉時人所為既
無歲月可考姑附于漢碑之末云

金石錄卷第二十

跋尾十

魏偽漢

吳趙偽

魏大饗碑

唐重立大饗碑

魏孔子廟碑

魏范式碑

魏太僕荀君碑

魏南郡太守卞統碑

晉南鄉太守司馬整頌

晉南鄉郡建國碑

魏大長秋游君碑

晉咸寧中建

游君碑陰

吳禪國山碑

吳天璽元年斷碑

晉右將軍鄭烈碑

晉太公碑

晉雲南太守碑

晉護菑校尉彭祈碑

晉彭祈碑陰

晉光祿勳向凱碑

晉鳴臚成公重墓刻

偽漢司徒公劉雄碑

魏鄧艾碑與下兩碑皆一時西晉立

金鄉守長薛君碑

張平子碑

趙淳圖澄造釋迦像碑

趙橫山李君神碑

趙西門豹祠殿基記

晉樂毅論

學生題名

宋武帝檄譙縱文

魏大饗碑

右魏大饗碑按魏志文帝以建安二十五年嗣位為丞相魏王改元延康夏六月南征秋七月甲午軍次于譙大饗六軍及譙父老今以碑考之乃八月辛未蓋魏志誤也是時王為丞相漢獻帝猶在位雖政去王室已自然操之死纔數月尔王軍次舊里初無念親之心方與群臣百姓置酒高會大設伎樂而臣下又相與伐石勒詞夸耀功德更以夏啓周成漢高祖光武為比豈不可笑也哉

唐重立魏大饗碑

附

右唐重立大饗碑大中五年亳州刺史李暨以舊文刊
缺再刻于石舊碑既斷續不可盡識而此本特完好故
附于其次俾覽者詳焉魏之事跡雖無足取而其文詞
工妙亦不可廢也

魏孔子廟碑

右魏孔子廟碑按魏志文帝以黃初二年正月下詔以
議郎孔羨為宗聖侯奉孔子之祀及令魯郡脩起舊廟
今以碑考之乃黃初元年又詔語時時小異亦當以碑
為正

右范式碑法書要錄云蔡邕書今以碑考之乃魏青龍三年立非邕書也

魏太僕荀君碑

右魏太僕荀君碑其額題魏故太僕西陽亭成侯荀府君之碑碑已殘缺其可見者嘗為齊相始平太守大將軍長史封西陽亭侯遂為太僕春秋五十有一正始五年夏六月丙寅薨惟其名字鄉里摩滅不可考矣

魏南郡太守卞統碑

右魏南郡太守卞統碑在今曹州宛句縣所叙世次官闕甚簡又多殘缺其略云君諱統字建業又云惟帝念

庸命以南邦又云嘉平二年十一月己亥寢疾卒官而
其首題魏故南郡太守卞府君之表按晉書卞壺傳濟
陰宛句人祖統琅邪內史而元和姓纂亦云統為晉琅
邪內史今此碑殘缺處猶有琅邪字尚存知其嘗為此
官而統以魏嘉平中卒姓纂以為仕晉者誤也

晉南鄉太守司馬整頌

右晉南鄉太守司馬整頌云初仕魏拜郎中中郎議郎
諫議大夫騎都尉給事中轉拜治書侍御史咸熙二年
出臨鄙郡加宣威將軍又云諡者就郡拜君世子執節
四讓推與兄嗣因辭懇誠泰伯三美君又加焉又云秦

始三年十一月使者奉詔命君南中郎將牧就統宛
都按晉史整事跡附見安平獻王孚傳後云兄奕卒以
整為世子歷南中郎將封清泉侯早卒其餘官闕皆不
載據史言兄奕卒以整為世子而碑言推與兄嗣二說
不同當以碑為正

晉南鄉郡建國碑

右晉南鄉郡建國碑已斷裂不完其額題南鄉郡建國
之碑其大略云嘉平五年漢水滔溢毀壞舊城又云正
元二年城此其餘文字可識處大略述遷郡事而銘文
有與晉常存之語知其為晉碑也按晉書地理志建安

十三年魏武帝盡得荊州之地分南陽縣西界立南鄉
郡及晉武平吳太康中改南鄉爲順陽而不載遷郡事
此碑蓋太康以前立故仍稱南鄉也碑有云河內司馬
府君者整也嘗守是郡自有碑此碑旣無建立年月因
附于整碑之次焉

大長秋游君碑

右大長秋游君碑云君諱述字度祖按元和姓纂云魏
河南尹游述始居廣平六代孫後魏尚書明根生僕射
肇今碑亦云述廣平人惟姓纂云述爲河南尹以碑考
之蓋未嘗爲此官又按後漢書百官志大長秋承秦將

行宦者景帝時更名大長秋或用士人中興常用宦者
述嘗爲宛句長尚書郎左丞元城令治書侍御史南安
北海安平東郡太守符節令遂爲大長秋皆非宦者之
職然則魏制蓋亦參用士人矣

游君碑陰

右游君碑陰按王莽嘗下令禁二名故當時士人皆以
一字爲名東漢時尚爾今此碑陰所記凡二百五十三
人亦無一人二名者碑晉咸寧中建距莽時二百年矣
而士大夫猶遵莽之令不變何哉

吳禪國山碑

右吳禪國山碑其前叙孫皓即位以後郡國祥瑞凡千餘言其後云乃以浚灘之歲欽若吳天月正華元郊天祭地紀號天璽又云丞相沈太尉璆大司徒燮大司空朝等以爲今衆瑞畢至三表納貢九垓八埏不被澤率按典繇宜先行禪禮紀勒天命遂於吳興國山之陰告祭刊石以對楊軋命廣報坤德按皓以丙申歲改元天璽碑言浚灘之歲是也皓淫虐無道人神憤疾而群臣方稱述符瑞讚頌功德蓋刻石後四年遂爲晉所俘矣

右吳天璽元年斷碑其前云上天帝言又云帝曰大吳
一萬方又云天發神讖文天璽元年七月己酉朔又云
天讖廣多不解解者十二字嗚呼其言可謂妖矣據吳
志天璽元年秋八月鄱陽言歷陽山石理成字凡二十
明年改元大赦以協石文今此碑乃在金陵驗其文與
吳志所載亦異莫可考究孫皓在位凡八改元而六以
符瑞然竟不能保其國蓋人事不脩而假託神恠以矯
誣天命其不終宜矣

晉右軍將軍鄭烈碑

右晉鄭烈碑云君諱烈字休林又云曾祖先生皇祖徵

君顯考將作大匠實有茂德載在國策烈晉史無傳以
碑考之嘗為文帝參佐武帝時仕為兗州刺史封東莞
男以疾徵拜議郎卒于太康二年追贈右軍將軍諡曰
僖侯云

晉太公碑

右晉太公碑其略云太公望者此縣人大晉受命四海
一統太康二年縣之西偏有盜發冢而得竹策之書書
藏之年當秦坑儒之前八十六歲今以晉書武帝紀考
之云咸寧五年汲郡人不準掘魏襄王冢得竹簡小篆
古書十餘萬言藏于祕府與此碑年月不同碑當時所

立又荀勗校穆天子傳其叙亦云太康二年與碑合可
以正晉史之誤其曰小篆書亦謬也且其書既在奏坑
儒八十六歲之前是時安得有小篆乎碑又云其周志
曰文王夢天帝服玄襪襪字字書所無以立於令狐之津帝曰
昌賜汝望文王再拜稽首太公於後亦再拜稽首文王
夢之之夜太公夢之亦然其後文王見太公而計之曰
而名為望乎荅曰惟為望文王曰吾如有所於見汝太
公言其年月與其日且盡道其言臣此以得見也文王
曰有有之之遂與之歸以為卿士而史記太公世家曰
西伯將出獵卜之云云於是西伯獵果遇太公於渭之

陽與語大說曰自吾太公望子久矣故號之曰太公望
載與俱歸二說殊不合而王逸注楚詞亦載文王夢太
公事與碑所書略同方逸為注時此書未出逸必別有
所據碑又云其紀年曰康王六年齊太公望卒參考年
數蓋壽一百一十餘歲而史記亦不載按前世所傳汲
冢諸書獨有紀年穆天子傳師春等不載所謂周志者
不知為何書而杜預左氏傳後叙云汲冢書凡七十五
卷皆藏祕府預親見之以此知不特十餘萬言史之所
記蓋不能盡其亡逸見于今者絕少也太公碑汲縣令

盧無忌立後題太康十年三月云

晉雲南太守碑

右晉雲南太守碑文字殘缺其姓氏名字鄉里皆不可
考略可見者嘗為尚書令史察孝廉除郎中遷武陽令
從龍驤將軍王濬征討遷雲南太守年五十有七卒最
後題太熙元年正月上旬造太熙武帝年號也

晉護羌校尉彭祈碑

右晉彭祈碑云君諱祈字子玄隴西襄武人也其先出
自顓頊有陸終之裔子大彭實王夏盟則其後也又云
歷郡右職州別駕從事于時庸蜀未殄侵擾王路洮西
之戰因敗運竒元帥獲安剋厭彊虜列上功狀除舍人

還參本軍事除涼州護軍河右未清戎寇鼎沸謀謨神
略簡在帝心遷西郡太守至官未久復臨酒泉遠夷望
風緇負歸命白山丁令率服賓貢敦煌令狐豐距違王
度淵泉之陳兵不血忍母老弟亡辭職去官聖上仁慈
聽君所求轉略陽太守近家祿養遂罹大艱侍筮還家
服紀終始有詔以軍州始分河右未清豺狼肆虐授君
節蓋除護羌校尉統攝涼土前後軍功應封七侯勞謙
退讓陰德不伐年未知命以太康十年三月癸酉薨天
子愍悼遣使者監護喪事策曰君秉心公亮所任有方
不幸殞歿朕甚痛惜故考厥參護羌軍事酒泉馬胡故

吏郎中秦母番王薄郭曉良吏夏侯俊等追思洪烈感
想哀嗟乃刊石勒銘焉西晉石刻見于今者絕少又多
殘缺此碑文字完好可喜乃錄其終始事跡于此

晉彭祈碑陰

右彭祈碑陰題名者凡三百十二人有故孝廉計掾計
史良吏廉吏計佐主簿領校錄事中部督郵西部督郵
軍議從事和戎從事記室督軍謀從事錄事史戶曹史
賊曹史金曹史田曹史倉曹史鎧曹史兵曹史客曹史
記室史節史車曹史水部都督中部都督功曹典事武
猛從事舍人蜀渠都水行事中部勸農西部勸農東都

水蜀渠平水門下賊曹門下議生錄事金曹據兵曹掾
作部史法曹史參戰騎督步督散督門下書佐弓馬從
事監牧史戟史金曹典事武猛史門下通事門下小史
凡一官多者十人少者不減數人其餘稱故吏無官號
者百六十餘人當時州郡官屬其濫如此蓋自漢以來
太守皆得自署置僚佐彭君為邊郡守故其所辟尤衆
今盡錄其名號以見一時之制焉

晉光祿勳向凱碑

右晉向凱碑云君諱凱字士伯河內山陽人也其後歷
叙官闕甚詳其最顯者為中書侍郎尚書吏部郎給

事黃門侍郎賜爵關中侯廣平太守散騎常侍游擊將軍北中郎軍司兖州刺史中郎將後云累遷河南尹春秋六十有八元康九年四月甲子薨追贈光祿勳據此乃當世顯人而晉史無傳故其事跡莫得而考蓋君子所賴以傳者非爵位也顧所立如何尔自古老死立壑而名稱顯著者甚衆雖在高位而功烈不見于當時聲跡無聞于後世者亦可勝數哉

晉鴻臚成公重墓刻

右晉成公重墓刻云永寧二年四月辛巳朔十五日乙未守鴻臚關中侯成公重魏夫人之靈柩前世以永寧

紀年者三漢安帝晉惠帝僞趙石祗按三國志建安二十
六年曹操始置關中侯十七級安帝時猶未有此號而
石祗永寧無二年然則重蓋惠帝時人也晉史有成公
簡成公綏皆東郡白馬人

僞漢司徒劉雄碑

右僞漢劉雄碑其額題漢故使持節侍中太宰司徒公
右部魏成獻王之碑碑云公諱雄字元英高皇帝之曾
孝宣帝玄孫值王莽篡竊遠道邊朔爲外國所推遂號
單于累葉相承家雲中因以爲桑梓焉雄劉元海弟也
晉書載記元海本匈奴人後漢高祖以宗女妻

冒頓爲兄弟故其子孫亦冒姓劉氏今此碑直云出自宣帝豈元海初起假此以惑衆乎碑後題嘉平五年歲在乙亥二月六日建按宋莒公紀年通譜劉聰以晉懷帝永嘉四年即僞位改元光興明年改元嘉平嘉平四年改元則嘉平豈復更有五年蓋載記初不編年故於改元歲月難考此碑當時所立不應差謬乃通譜誤也

鄧艾碑

與下兩碑皆西晉時立

右鄧艾碑其額題魏使持節征西將軍方城侯鄧公之碑碑無建立年月以詞考之蓋晉初立按魏晉史其名

皆為艾而碑作義古艾義通為俊義芟義義安之字疑
艾名其音如此而今人讀如蕭艾之字恐非是又按艾
平蜀即軍中拜太尉而碑但題為征西將軍者疑尋被
禍未嘗受命而艾始封方城侯後改封鄧侯碑尚云方
城侯何哉

金鄉長薛君頌

右薛君頌在今濟州金鄉縣其額題故金鄉長汝南薛
君之頌云君諱諱字公謀其他文字皆完好驗其詞蓋
縣長德政頌爾雖無建立年月而有吳寇未下一字關耀威
海隅之語知其為晉碑也

張平子碑

右張平子碑晉南陽相夏侯湛撰識緯之說興于西漢之末而爛漫于東漢之世雖一時名儒皆從而惑焉獨平子奮然闢之甚力余嘗歎以謂如平子可謂豪傑之士不為流俗所移者今湛為此碑乃云金匱玉版之奧識契圖緯之文罔不該羅其情可謂不知平子矣

趙浮圖澄造釋迦像碑

右趙浮圖澄造釋迦像碑唐封演聞見記云內丘縣西古中丘城寺有碑後趙石勒光初五年立碑云大和上竺浮圖澄者天竺大國附庸小國王之元子也本姓濕此

碑即演所見其說皆同按晉書藝術傳澄本姓帛氏今碑
作濕碑當時所立宜得其真又史作佛圖碑作浮圖二字
音相近尔惟光初乃劉曜年號而以為石勒時蓋演誤也

趙橫山李君神碑

右趙橫山李君神碑題建武六年歲在庚子三月己亥
二十一日癸丑按晉書帝紀石虎以咸和九年自立
為趙天王而載記云咸康元年僭稱居攝趙天王據帝
紀則建武六年歲在己亥據載記則歲在庚子宋莒公
紀年通譜獨以本紀為據今此碑及西門豹祠殿基記
並六年建皆云歲在庚子以此知帝紀之失非二碑則

晉紀與載記得失不復可考矣

趙西門豹祠殿基記

右趙西門豹祠殿基記云趙建武六年歲在庚子秋八月庚寅造西門祠殿基又云巧工司馬臣張由監作吏臣杜波馬孫殿中司馬臣王基殿中都尉臣潘侃侍御史騎都尉臣劉誼左校令臣趙升殿中校尉臣顏零等監其下刻物象甚多如土長強良碩章舒懷雀之類其名頗異近歲臨淄縣人耕地得巧工司馬印遍尋史傳皆無此官名不知為何代物今乃見于此碑云

晉樂毅論

右晉樂毅論石本舊藏高紳學士家集古錄云紳死其子弟以石質錢於富人而富人家失火遂焚其石者非也元祐間余侍親官徐州時故郎官趙竦被

言開呂梁洪挈此石隨行已斷裂用木為匣貯之竦尤珍惜親舊有求墨本者必手摸以遺之竦歿今遂不知所在

學生題名

右學生題名歐陽公集古錄以為漢文翁學生余獨疑其非是蓋以為西漢時立則字畫不類以為東漢則東漢絕無二名者今此碑二名者凡數人又唐顏一

書益州學館廟堂記載從以來石刻皆備獨無此題名
使其為文翁學生決不肯漏落余以字畫驗之疑其為
晉以後人所立然初無所據未敢遂以為然其後以地
里書參考乃決知其非文翁學生也題名有幹江陽趙
嵩典學從事史寧蜀常仲舒憲道左生遂寧董即玄明
左生晉原楊容宗長按晉書志江陽郡蜀劉備置寧蜀
遂寧晉原並桓溫平蜀後置四郡東西兩漢時皆未有
然則此碑為東晉以後人所立不疑矣

宋武帝檄譙縱文

右宋武帝檄譙縱文按頗有意書成都學館廟堂記云

石室北壁有晉義熙九年刺史朱齡石勒宋高祖檄誰
縱文其字磨滅不可備識學館記唐初立距今又數百
年宜其摩滅愈難識矣然其歲月官爵猶略可辨云

金石錄卷第二十

晉伯碑

漢書卷之...

漢書卷之...

漢書卷之...

漢書卷之...

漢書卷之...

漢書卷之...

漢書卷之...

漢書卷之...

假不異隋侯珠
孫鬻之何其愚

金石錄卷第二十一

跋尾十一

後魏

東魏

大代華嶽碑

後魏孔宣尼廟記

後魏孝文吊比干文

後魏比干碑陰

後魏大鴻臚卿鄭循伯碑

後魏御射碑

後魏太尉于烈碑

後魏鄭義碑

後魏鄭義上碑



後魏車騎大將軍邢巒碑

後魏叱間神寶脩關城銘

後魏安東將軍孫公墓誌

後魏定州刺史崔亮頌

後魏贈司空元暉碑

後魏范陽王碑

後魏賀拔岳碑

東魏膠州刺史祖淮碑

東魏大覺寺碑

東魏大覺寺碑陰

東魏高翻碑

東魏張烈碑

東魏賈思同碑

東魏魏蘭根碑

後魏化政寺石窟銘

梁重立羊祜碑

東魏敬君像頌

大代華嶽碑

右大代華嶽碑歐陽公集古錄云魏自道武天興元年
議定國號群臣欲稱代而道武不許乃仍稱魏自是之

後無改國稱代之事今魏碑數數有之碑石當時所刻
不應妄但史失其事尔余按崔浩傳云方士初織奏改
代為萬年浩曰昔太祖道武皇帝應期受命開拓洪業
諸所制宜無不循古以始封代土後稱為魏故代魏兼
用猶彼殷商蓋當時國號雖稱為魏然猶不廢始封故
兼稱代尔此事亦見陽松玠談藪云

後魏孔宣尼廟記

右後魏孔宣尼廟記在今懷州界中文詞頗古質可喜
云孔子欲北從趙鞅聞殺鳴犢遂俎車而返及其沒也
晉人思之於太行嶺南為之立廟焉記太和元年立其

額又有延興四年太上皇帝祭孔子文者孝文之父獻文帝也

後魏孝文吊比干文

右後魏孝文吊比干文其首已殘缺惟元載字可識其下云歲御次乎閹茂望舒會於星紀十有四日日惟甲申按爾雅云歲在戊曰閹茂又鄭康成注月令仲冬者日月會於星紀後魏書孝文以太和十八年十一月甲申經比干墓親為吊文樹碑而刊之是歲甲戌其說皆合其未嘗改元而稱元載者孝文以是歲遷都洛陽蓋以遷都之歲言之也

後魏比干碑陰

右比干碑陰盡紀侍從群臣官爵姓名按後魏書官氏志丘穆陵氏後改爲穆氏今此碑自侍中丘目陵亮以下同姓者凡三人字皆作目而元和姓纂所書與此碑正同文碑自穆崇至亮皆姓立目陵氏姓纂亦云後改爲穆而史但云姓穆者皆其闕誤

後魏大鴻臚卿鄭循伯碑

右後魏鄭循伯碑元和姓纂載滎陽鄭氏云曄生七子白麟小白叔夜洞林歸藏連山幼麟號七房鄭氏循伯小白子也按後魏書幼麟傳云父曄生六子又云幼麟

五兄長白麟次小白次洞林次叔夜次連山而無歸藏
其次第亦不同又姓纂云小白名茂而史云幼麟名羲
疑自白麟以降皆其字也據碑與姓纂皆云循伯仕至
大鴻臚卿而史言少卿者誤矣

後魏御射碑

右後魏御射碑在今懷州按北史及魏書宣武紀景明
三年十月庚子帝躬御弧矢射遠及一百五十步群臣
勒銘於射所即此碑也碑云維魏定鼎遷中之十載又
云皇上春秋一十有七據史及孝文吊比干文皆云太
和十八年遷都洛陽至景明三年蓋九年矣而碑作十

載恐誤又史亦宣武以太和七年生景明四年當年二十而碑言年十七則當以碑爲據然則宣武終于延昌四年蓋壽三十五歲而史以爲壽三十三者亦誤也余按禮記問天子國君之年對者皆不敢斥言魯襄公送晉侯晉侯問公年季武子對曰會沙隨之歲寡君以生是也今魏人乃直書其君之年于碑豈禮也哉

後魏太尉于烈碑

右後魏太尉于烈碑云初以功臣子起家爲中散轉屯田給事內都幢將遷左衛將軍而後魏書列傳云少拜羽林中郎遷羽林中郎將以本官行秦雍二州事遷司

衛監以碑考之列皆未嘗為此官又其父洛拔為黃龍
鎮都大將而曰和龍烈為屯田給事而曰給納卒年六
十七而曰六十五者皆史之誤又按烈始封昌國子改
鉅鹿公按烈祖栗磾嘗假封新安公後又改洛陽侯進
封聊城縣開國子再進為開國伯開國侯其卒追封為
鉅鹿郡開國公蓋當時之制如此魏書官氏志不載皆
莫可攷

後魏鄭義碑

右後魏鄭義碑魏史列傳與此碑皆云義滎陽開封人
碑又云歸葬于滎陽石門東十三里三皇山之陽而碑

乃在今萊州南山上磨崖刻之蓋道昭嘗爲光州刺史
即今萊州也故刻其父碑于茲山余守是州嘗與僚屬
登山裴徊碑下久之傳云義卒尚書奏謚曰宣詔以義
雖宿有文業而治闕廉清改謚爲文靈今碑首題曰榮
陽鄭文公之碑其末又云加謚曰文傳載賜謚詔書甚
詳不應差誤而碑當時所立必不敢諱其一字皆莫可
知也已

後魏鄭義上碑

右鄭義上碑初余爲萊州得義碑于州之南山其末有
云上碑在直南二十里天柱山之陽此下碑也因遣人

訪求在膠水縣界中遂摸得之義之卒葬滎陽其子道
昭永平中為光州刺史為其父磨崖石刻二碑焉按地
里書後魏皇興四年分青州置光州領東萊郡隋文帝
時罷郡仍改光州為萊州云

後魏車騎大將軍邢巒碑

右後魏邢巒碑云巒字山賓而史作洪賓其為梁州刺
史碑云徵云都官尚書而史作度支後改為七兵尚書
而史不載又巒為崔亮所糾據碑言戎車旣班猶以在
州之誣遭禁一替而史以謂元暉高肇為巒申釋故得
不坐者非也

後魏叱問神寶脩關城銘

右後魏叱問神寶脩關城銘題右將軍西中郎將叱問神寶銘又云維大魏神龜元年歲次戊午十一月壬午朔十日壬辰起功三十萬脩治關城并作館第敬造三級浮圖按後魏書官氏志及元和姓纂有叱門氏後改爲門而無叱問氏蓋其闕漏也

後魏安東將軍孫公墓誌

右後魏孫公墓誌其名字鄉里年壽皆不載獨其末載贈官制書云故安東將軍銀青光祿大夫棗強縣開國男孫蔚知其名蔚又云歸葬於世邑武遂知其爲邑人

也按後魏書儒林傳有孫惠蔚其所書事跡與志皆合
傳云先單名蔚正始中侍講禁內夜論佛經有愜帝旨
詔使加惠號惠蔚法師焉

後魏定州刺史崔亮頌

右後魏崔亮碑題云魏鎮北將軍定州刺史崔使君至
化之頌蓋亮嘗為定州既去郡人立此碑頌德爾其間
載亮所歷官甚詳與北史及後魏書列傳多合惟其自
定州歸朝歷殿中都官吏部三尚書而傳但言自殿中
遷吏部尔亮以正光二年卒而碑神龜三年建在亮卒
前故自為侍中以後事碑皆不及載也

後魏贈司空元暉碑

右後魏元暉碑據後魏書列傳云暉鎮西將軍忠子而北史以爲忠弟德之子今以碑考之北史是也又碑云孝文時爲主客郎中而魏史言世宗即位拜此官碑云神龜二年卒而史言元年卒者亦非是其餘遷拜次第時有不同不盡錄也

後魏范陽王碑

右後魏范陽王碑云王諱誨高祖孝文皇帝之孫大師武穆王之子今世所傳後魏書北史孝文諸子列傳皆文字脫落不完惟孝明紀載孝昌二年封廣平王懷庶

長子誨為范陽王以此知其為懷子據碑云懷謚武穆而傳作文穆者誤也誨仕至僕射為尔朱兆所殺事見莊帝本紀

後魏賀拔嶽碑

右後魏賀拔嶽碑嶽當時名將也比史及後魏書皆有傳初為尔朱榮親將其後齊神武使侯莫陳悅害之尔朱榮凶殘狂悖蓋魏之莽卓也而此碑乃以為圖伊霍之舉豈不可笑也哉然魏收為魏史受榮子文略之賂亦以榮子比韋彭伊霍乃知貪鄙無知之徒世不乏人也按莊帝諸書皆作孝莊而此碑獨作孝壯疑書碑者之

誤

東魏膠州刺史祖淮碑

右東魏祖淮碑云君膠州平昌安丘人也六世祖逖又云其卒贈膠州刺史按後魏永安中分青州置膠州隋開皇五年改為密州焉

東魏大覺寺碑

右東魏大覺寺碑在洛陽碑陰題韓毅書據北史毅魯郡人工正書神武用為博士以教彭城景思王攸當時碑碣往往不著名氏毅以書知名故特自著之也然遺蹟見于今者獨此碑尔

東魏大覺寺碑陰

右大覺寺碑陰題銀青光祿大夫臣韓毅隸書蓋今楷
字也庾肩吾曰隸書今之正書也張懷瓘六體書論亦
云隸書者程邈造字皆真正亦曰真書自唐以前皆謂
楷字為隸至歐陽公集古錄誤以八分為隸書自是舉
世凡漢時石刻皆目為漢隸有一士人力主此論余嘗
出漢碑數本問之何者為隸何者為八分蓋自不能分
也因覽此碑毅自題為隸書故聊誌之以祛來者之惑

東魏高翻碑

石東魏高翻碑齊獻武王歡叔父也魏書本傳云以元

象中追加贈謚碑後題建立歲月文字殘缺惟有魏元
字可辨又云歲次己未按東魏孝靜以元象二年十一
月改元興和是年歲次己未此碑蓋元象二年建也

東魏張烈碑

右東魏張烈碑在今青州界中文字摩滅以事考之蓋
張烈也按北史列傳烈為家誠千餘言臨終敕子姪不
聽求贈但勒家誠立碣而已即此碑是也其卒葬年月
殘缺不可辨傳亦不載惟青州圖經稱卒於元象中云

東魏賈思同碑

右東魏賈思同碑思同與其兄思伯後魏書皆有傳云

青州益都人今其墓乃在壽光縣而思伯之碑亡矣

東魏魏蘭根碑

右東魏魏蘭根碑按北史列傳云蘭根起家北海王國侍郎而碑云起家為奉朝請遷貞外散騎侍郎碑云以在岐州之功封永興縣開國侯而史不載又史云天平初謝病以開府儀同歸本鄉武定三年薨而碑云薨於天平二年其卒也史云贈司空而碑作司徒皆當以碑為正

後魏化政寺石窟銘

右後魏化政寺石窟銘北史及魏書有宦者抱疑傳云

疑終於涇州刺史自言其先姓杞後辟禍改焉今此碑
題涇州刺史杞疑造疑後復改從其本姓尔

梁重立羊祜碑

右羊祜碑梁大同中以舊碑殘缺再書而刻之碑陰具
載其事今附于次

東魏敬君像頌

右東魏敬君像頌敬君名曦顯雋從弟也碑六十世祖
漢揚州刺史韶按後周書敬珍傳唐書宰相世系表皆
云韶漢末為揚州刺史與此碑所書同而姓苑元和姓
纂皆作歆疑轉寫之誤又據碑顯雋乃韶十世孫而姓

纂以為九世恐亦誤也

金石錄卷第二十一

卷之...

...

...

...

...

...

...

...

...

...

...

金石錄卷第二十二

跋尾十二

後魏

隋北齊

後魏鎮東將軍劉乾碑

後魏汝南王碑

北齊造像記

北齊郁久閭業碑

後周延壽公碑頌

後周太學生拓拔府君墓誌

北齊華陽公主碑

北齊天柱山銘

後周華嶽廟碑

後周河濱碑

後周同州刺史普六如忠墓誌

北齊隴東王感孝頌

後周溫州刺史烏丸僧脩墓誌

北齊長樂王尉景碑

北齊馮翊王平等寺碑

北齊臨淮王像碑

北齊白長命碑

北齊大安樂寺碑

北齊司空趙起碑

北齊贈司空趙奉碑

北齊宜陽國太妃傅氏碑

北齊赫連子悅清德頌

隋興國寺碑陰

隋齊國太夫人楊氏墓誌

隋化善寺碑

隋願力寺舍利寶塔函銘

隋周羅暉墓誌

隋禹廟殘碑

隋黃門侍郎柳旦墓誌

隋尚書左僕射元壽碑

隋西林道場碑

後魏鎮東將軍劉乾碑

右魏鎮東將軍劉乾碑云君諱乾字天自胡夷亂華典章文物掃地而盡至於名字書畫皆一出其私意而無復稽考可謂亂世矣若劉君者名乾字天豈不恠哉

後魏汝南王碑

右後魏汝南王碑王名悅孝文子也尔朱榮之亂奔梁梁武厚遇之立為魏主後復歸北據後魏書列傳云出帝時為大司馬卒而帝紀與北史皆言為出帝所殺蓋

列傳之誤而此碑亦不書者諱也

北齊造像碑

右北齊造像記云天保四年歲次己丑案齊文宣以東魏武定八年受禪改元天保是歲庚午至四年當為癸酉而此記誤書癸為巳尔其字畫不工特以甲子差誤恐後來疑焉因錄于此

北齊郁久閭業碑

右北齊郁久閭業碑郁久閭其姓本出東胡見於北朝者有後魏景穆恭皇后郁久閭氏云河東王毗之妹今魏書列傳但有閭毗文有閭大肥皆云蠕蠕人蓋同族

也大肥道武時歸國尚華陰公主以此碑考之業乃大肥之孫魏書於皇后傳氏姓郁久問而於毗與大肥傳止言姓問毗於景穆皇后為兄弟其姓不應有異使後嘗更姓史家亦當具載兼大肥之孫亦不當復用舊姓也蓋史之闕漏又碑云祖之大泥鵲起而史作大肥碑又云業茹茹國王步渾之玄孫蠕蠕或稱茹茹見於前史惟魏書蠕蠕列傳自木骨問以來叙其世系甚詳無名步渾者亦莫知其為何人也

後周延壽公碑頌

右後周延壽公碑頌云勲州刺史延壽郡開國公萬紆

于寔考之于史寔太師燕國公于謹子也謹後魏新安
公于栗磾子洛拔之後余家有洛拔子烈碑述其世系
甚詳云遠祖之在幽州世首部落陰山之北有山號萬
細于者公之奕葉居其原趾遂以爲姓暨高祖孝文皇
帝時始賜姓爲于氏焉今此碑復稱萬細于者蓋後周
時凡孝文賜姓者皆復改從舊云又姓纂及唐書宰相
世系表皆云謹洛拔五世孫也以後魏及周書考之洛
拔以太安四年卒年四十五謹以正光四年爲廣陽王
元深長流叅軍年三十一洛拔之卒距謹之爲叅軍蓋
六十四年矣洛拔既卒世不應後六十四年已有五世

孫年三十一也以此知言謹為洛拔五世孫者蓋未可信又周書稱謹祖名安定而唐書表作子安亦莫究其孰失也

後周太學生拓拔府君墓誌

右後周太學生拓拔府君墓誌陳使周弘正撰云君諱吐度真魏昭成皇帝之後也夷虜以三字為名者甚衆托拔君為書生尚仍舊俗何哉蓋自魏孝文帝惡夷虜姓氏盡易之至後周一切復改從舊故當時士人名字亦皆用虜語無足恠也

北齊華陽公主碑

右北齊華陽公主碑云公主諱季艷蓋魏孝文帝之孫
廣平王懷之女北齊趙郡王叡之母也按北史叡列傳
其前云母華山公主而其後乃作華陽今此碑及北齊
書皆正言封華陽蓋北史誤

北齊天柱山銘

右北齊天柱山銘在今萊州膠水縣初後魏永平中鄭
道昭為郡守名此山為天柱刻銘其上至北齊天統元
年其子述祖繼守此邦復刻銘焉案後魏書道昭之父
義謚文靈而道昭所立義碑乃云謚為文今此碑又云
謚文貞皆莫可考

後周華嶽廟碑

右後周華嶽廟碑萬紉于瑾撰趙文淵字德本書按後周書列傳有趙文深字德本蓋唐初史官避高祖諱故改淵為深尔萬紉于瑾者唐瑾也周文帝時賜姓宇文後以于謹請與同姓更為萬紉于云

後周河瀆碑

右河瀆碑後周天和二年建內史大夫琅邪王褒字子淵造文趙興郡守趙文淵字德本奉勅書余嘗讀揚大年談苑云千字文題勅台外散騎侍郎周興嗣次韻勅字乃梁字傳寫誤尔當時帝王命令尚未稱勅至唐顯

慶中始云不經鳳閣鸞臺不得稱勅勅之名始定於此
案此碑及唐瑾撰華嶽廟碑皆文淵奉勅書後周距梁
時未遠又隨薛道衡撰老子碑唐初虞世南撰孔子廟
堂杜如晦碑歐陽詢書昭陵九成宮碑皆作奉勅如此
類甚衆略舉一二要知不獨始於顯慶大年之論非也
然則唐人所謂不經鳳閣鸞臺不謂之勅者蓋言命令
當繇廟堂出非謂勅之名始于此也然文淵奉勅書碑
而自著其字何哉

後周同州刺史普六如忠墓誌

右普六如忠墓誌普六如者楊忠隋高祖父也後魏時

賜姓以誌考傳其事者合惟其為都督涇幽雲顯鹽靈
等六州諸軍事而傳以幽為幽者蓋傳寫誤尔

北齊隴東王感孝頌

右北齊隴東王感孝頌隴東王者胡長仁也武平中為
齊州刺史道經平陰有古冢詢訪耆舊以為郭巨之墓
遂命僚佐刻此頌焉墓在今平陰縣東北官道側小山
頂上隧道尚存惟塞其後而空其前與杜預所見邢山
上鄭大夫冢無異冢上有石室制作工巧其內鐫刻人
物車馬似是後漢時人所為余自青社如京師往還過
之屢登其上按劉向孝子圖云郭巨河內溫人而酈道

元注水經云平陰東北巫山之上石室世謂之孝子
堂亦不指言何人之冢不知長仁何所據遂以為巨墓
乎按頌有孝子堂之語
故知即水經所載也

後周溫州刺史烏丸僧脩墓誌

右後周烏丸僧脩墓誌僧脩本姓王氏梁南城侯神念
之子太尉僧辯之弟歸後周仕為溫州刺史卒元和姓
纂及唐史宰相世系表皆云神念父囧為護烏丸校尉
因號烏丸王氏今墓誌乃云僧脩歸周賜姓烏丸又諸
書皆云神念謚壯而墓誌作莊唐表云僧脩生景孝而
墓誌云名祥字景孝當以墓誌為正

北齊長樂王尉景碑

右北齊長樂王尉景碑按北齊書景字士真而碑云字副羽蓋傳之誤

北齊馮翊王平等寺碑

右北齊平等寺碑題太宰馮翊王定光像寶殿碑馮翊王者名潤齊神武子也碑云寺魏廣平王懷所立永平中造定光銅像一區高二丈八尺屬魏季像在寺外未果移入其後齊高祖過洛始遷像入寺至潤又增脩殿宇焉據楊衍之洛陽伽藍記云孝昌三年十二月中此像面有悲容兩目垂淚三日而止其後尔朱榮北海王

尔朱兆入洛陽像皆悲泣如初每經神驗朝野惶懼其
事甚異而此碑不載

北齊臨淮王像碑

右北齊臨淮王像碑臨淮王者婁定遠也此北齊書和
士開傳定遠與趙郡王叡謀出士開為兗州刺史未行
士開納賂定遠得留復出定遠為青州刺史責叡以不
臣之罪而殺之定遠歸士開所遺加以餘珍賂之乃免
如史所書定遠可謂小人矣定遠本傳但云封臨淮郡
王而不書其為青州者闕也又定遠從弟叡既附見定
遠傳而於外戚傳又重出南北朝諸史猥并類如此可

笑也

北齊白長命碑

右北齊白長命碑云公字長命而其名已殘缺長命白建之父也北齊書及北史建傳皆云父名長命者蓋齊魏間人多以字為名耳

北齊大安樂寺碑

右北齊大安樂寺碑其額題廣業王大安樂寺碑廣業王者尉萇命之子破侯也碑云魏末離亂萇命嘗營護此寺其後破侯與其弟興敬復加營葺故立此碑按北史及北齊書有尉長命傳今碑乃作萇命文史云其卒

謚曰武壯而碑乃作武莊當以碑爲正破侯嘗仕爲中書令尚書左僕射尚書令錄尚書事封廣業王官甚顯而史無傳

北齊司空趙起碑

右北齊趙起碑按北齊書列傳云起天統二年除滄州刺史武平中卒于官今以碑考之起自滄州還闕除吏部尚書判外兵省事遷光祿大夫以本官兼尚書左僕射出行懷州事轉膠州刺史封南泉郡王乃卒史皆不書而云卒於滄州誤矣

北齊贈司空趙奉碑

右北齊趙奉碑奉彥深也碑云父諱奉字奉伯而北齊書及北史但云名奉伯而已碑又云父清河府君剖符東秦著績齊土久於其職遂即家焉今為平原貝丘人也而史乃云彥深高祖父難為清河太守遂家清河清河后改為平原二事不同皆當以碑為正惟史以謂彥深本名隱避齊廟諱故以字行而碑直書為隱何哉

北齊宜陽國太妃傅氏碑

右北齊宜陽國太妃傅氏碑其額題齊故女侍中宜陽國貞穆太妃傅氏碑碑云太妃諱華清河貝丘人也按北史後魏置女侍中視二品然本後宮嬪御之職今以

宰相母爲之惟見于此傳氏趙彥深之母有賢操事載于史

北齊赫連子悅清德頌

右北齊赫連子悅清德頌據北史列傳子悅爲鄭州刺史郡人請爲立碑詔許之碑所載亦同而碑乃在今許昌者按隋書地理志潁川郡舊置潁州東魏改曰鄭州後周改曰許州又傳六子悅天保中爲揚州刺史而碑作陽州者按地理志東魏於宜陽置陽州後周改爲熊州云

右隋興國寺碑陰丁道護書道護所書興國啓法兩寺
碑皆在襄陽歐陽公嘗得啓法寺碑列于集古錄中而
於大學官楊襄處見興國寺碑以不得入錄爲恨今碑
陰又有襄州鎮副摠管柳止戈以下十八人姓名字畫
尤完好歐陽公所未見也蔡君謨題其後云在杭州日
坐有客曰小說稱丁真永草永固知名丁何人也予謂
道護豈其人耶按法書要錄丁覘與智永同時人善隸
書世稱丁真永草非道護也

隋齊國太夫人楊氏墓誌

右隋齊國太夫人楊氏墓誌云夫人字季姜僕射高穎

母也隋書穎傳云穎以母憂去職開皇二年伐陳詔穎
節度諸軍據此穎之丁內艱蓋在開皇初今以墓誌考
之楊氏之卒乃在十年傳稱穎既貴其母常誠以遠禍
後穎竟以危言爲煬帝所誅如其言可謂賢母矣常恨
不著其姓氏今乃見于此云

隋化善寺碑

右隋化善寺碑在徐州碑陰有郎餘令題記云隋尹式
撰余元祐間侍親官彭門時爲兒童得此碑今三十餘
年矣

隋頴力寺舍利寶塔函銘

右隋願力寺舍利寶塔函銘仁壽三年相州刺史薛胄
建唐劉禹錫集載僧靈澈詩有云經來白馬寺僧到赤
烏年禹錫稱其工因讀此銘序亦以白馬之寺對赤烏
之年乃知前人已有此語蓋隋唐間文體大率以偶儷
為工雖格力卑弱然用事親切時有可喜也

隋周羅暎墓誌

右隋周羅暎墓誌無書人姓名而歐陽率更在大業中
所書姚辨墓誌元長壽碑與此碑字體正同蓋率更書
也往時書學博士米芾善書尤精於鑒裁亦以余言為
然羅暎名將隋史有傳今以墓誌考之羅暎在陳自鍾

離太守遷秦郡而史不載又史云開皇中自幽州刺史
轉涇州母憂去職復起授幽州遼東之役徵為水軍總
管進為上將軍而墓誌自幽州為水軍總管進上將軍
然後為涇州其遷拜次第皆不同又史云拜東宮右虞
候率而墓誌為左監門率史云轉右衛率而墓誌為右
監門武侯率史云自右武侯大將軍進授上將軍而墓
誌不載蓋未嘗拜此官也皆當以墓誌為據

隋禹廟殘碑

右隋禹廟殘碑其文字磨滅十五六而其末隱隱可辨
云會稽郡下獄史陵書筆法精妙不減歐虞案張懷瓘

書斷云褚遂良嘗師史陵蓋當時名筆也今此碑摩滅而僅存世之藏書者皆未嘗有非余收錄之富則遂不復見于世矣

隋黃門侍郎柳旦墓誌

右隋柳旦墓誌以考隋史列傳其始終事跡皆同惟傳云攝判黃門侍郎而墓誌云檢校黃門侍郎小異又墓誌載旦六子燮則綽指潛亭而元和姓纂與唐史室相世系表皆云旦五子而闕其第五子潛亦當以墓誌為是也

隋尚書左僕射元壽碑

右隋元壽碑虞世基撰歐陽詢書按隋史壽開皇中為尚書主爵侍郎而碑云主爵郎碑云從晉王伐陳時兼揚州長史授行軍總管長史平陳遂為揚州總管府長史遷尚書左丞而史但云自元帥府屬平陳入為左丞爾又為太常少卿時兼雍州司馬史亦不載其卒贈尚書左僕射光祿大夫封博平侯而史但云贈右僕射皆其闕誤史云壽在周封儀隴縣侯而碑作儀龍侯今按隋書地理志有儀隴縣屬巴西郡而無儀龍未知孰失也

右隋西林道場碑題人而博士歐陽詢撰而不著書人名氏余家藏隋姚辨墓誌元壽碑皆率更在大業中為博士時所書與此碑字體絕不類知其非率更書也

金石錄卷第二十二

其間有文而書或尺其於碑誌而不知其非對今世
書天為故錄大夫世世平對而史對古錄中對撰撰
其間有書云冬而史對存其其其其其其其其其其
其間有書云其其其其其其其其其其其其其其其其
尚書廷尉封碑而取云主務物賦云其晉王外刺却其
古謂元壽碑真書本辨刻刻刻刻刻刻刻刻刻刻刻刻

金石錄卷第二十三

跋尾十三
唐

唐司空竇抗墓誌

後周黃羅刹碑

隋桂州總管侯莫陳穎墓誌

唐孔子廟堂碑

唐杜如晦碑

唐房彥謙碑

唐房彥謙碑陰

隋衛尉卿竇慶墓誌

唐大理卿郎穎碑

唐丹州刺史張崇碑

唐昭陵刻石文

唐昭陵六馬贊

唐益州長史裴鏡民碑

唐溫彥博碑

唐贈高穎禮部尚書詔

唐河間元王碑

唐段志玄碑

唐弘濟寺碑

唐獨孤使君碑

唐晉祠銘

唐相州刺史侯莫陳肅碑

唐孔穎達碑

唐太府卿李襲譽墓誌

後周太宗伯唐瑾碑

隋皇甫誕碑

唐司空竇抗墓誌

右唐竇抗墓誌歐陽詢撰并書其所歷官新舊史所書頗多闕略蓋抗在隋自岐州刺史遷冀州又遷定州又為遼東道行軍總管改朔州道遂授持節幽易燕檀四

州諸軍事幽州總管幽州刺史而史直云自岐州轉幽
州總管其歸唐為弘化道安撫大使遷光祿大夫又為
左武侯大將軍時以本官領同州刺史史皆不載其卒
史言謚密而誌作容新史言贈司徒而誌作司空舊史
亦為司空與誌合

後周黃羅刹碑

右後周黃羅刹碑虞世南撰羅刹仕周為行軍總管其
子君漢唐初為將有功武德中為父追立此碑按後魏
元叉本名夜叉其弟刹本名羅刹元樹遺公卿書譏詆
以謂夜叉羅刹皆鬼名也今羅刹周人去魏不遠猶以

爲名何哉

隋桂州總管侯莫陳賴墓誌

右隋侯莫陳賴墓誌賴隋書有傳以其事考之多合惟傳言賴謚曰定而誌不載按誌云公第四子尚書考功郎中軋會而傳作虔會軋虔義理皆通然余嘗得軋會碑乃云名肅字軋會元和姓纂所載亦同疑其以字行爾蓋隋唐間人多如此

唐孔子廟堂碑

右唐孔子廟堂碑虞世南撰武德時建而題云相王旦書額者蓋舊碑無額後時增之爾至文宗朝馮審爲

祭酒請琢去周字而唐史遂以此碑爲武后時立者誤也睿宗所書舊額云大周孔子廟堂之碑今世藏書家得唐人所收舊本猶有存者云

唐杜如晦碑

右唐杜如晦碑虞世南撰驗其字畫蓋歐陽詢書也如晦唐偉人史家立傳不應草草今以碑考之頗多異同傳言如晦大業中嘗以選補滏陽尉棄官去而碑言在隋起家爲雍州從事及煬帝幸江都代王使君判留守事蓋如晦未嘗爲滏陽尉而亦未嘗棄官去也傳言秦王爲皇太子授左庶子而碑作右庶子傳言爲檢校侍

中攝吏部尚書而碑作攝侍中吏部尚書傳云其祖名
杲而碑所書乃名徽傳云謚曰成而碑所書乃誠也蓋
此碑乃太宗手詔世南勒文于其石其官爵祖父名諱
不宜有悞皆可以正史氏之失矣

唐房彥謙碑

右唐房彥謙碑彥謙玄齡父也在隋任司隸刺史出為
涇陽縣令卒官不大顯而隋書立傳二千餘字者蓋脩
史時玄齡方為宰相故也彥謙自曾祖而下三世皆封
壯武侯隋唐史玄齡碑所書皆同獨此碑作莊武未知
孰是碑李百藥撰歐陽詢八分書在今齊州章丘縣界

中世頗罕傳

唐房彥謙碑陰

右唐房彥謙碑陰具載彥謙歸葬恩禮儀物之盛太宗
遇玄齡可謂厚矣蓋厚其禮所以責其報也太宗可謂
善任人矣

隋衛尉卿竇慶墓誌

右隋竇慶墓誌慶曾祖昭祖善父榮定北史及北齊後
周隋書皆有傳諸史皆云慶祖名善而慶之兄抗墓誌
乃云名溫唐書宰相世系表以謂善一名溫今此誌名
溫善皆不可考慶大業中仕為衛尉卿史云為群賊所

子未缺
殺而墓誌云為賊盧圓月所殺墓誌貞觀四年刻其小
措工妙不減歐虞惜其不著名氏也

唐大理卿郎穎碑

右唐郎穎碑李百藥撰歐陽公集古錄云穎父名基字
世業而百藥書穎世次但云父世業又書穎兄茂碑亦
然考其碑文有皇基締構之言則基字當時公私無所
諱避而百藥書穎父字而不名不詳其義是以君子貴
乎博學余按隋及唐初人多以字為名故雖一時名公
卿其名字混殽略不可攷又案穎字楚之其事迹雜見
北史隋書皆書為楚之而不載其名穎獨唐書郎餘令

傳云祖頴字楚之至於傳中敘述行事止稱楚之疑其亦以字行尔

唐丹州刺史張崇碑

右唐丹州刺史碑首尾已殘缺其可見者云公諱崇字平高按新唐書劉裴傳後載起義功臣事迹有張平高云綏州人從唐公平京城累授左領軍將軍蕭國公貞觀初為丹州刺史坐事以右光祿大夫還第卒今以碑考之其事皆同惟傳以字為名耳

唐昭陵刻石文

右唐昭陵刻石文太宗為文德皇后立歐陽詢書其文

于太宗實錄今石刻已磨滅故世頗罕傳其略可見者
有云無金玉之寶玩用之物木瓦寓人有形而已欲使
盜賊息公存亡無異又云俯視漢家諸陵猶如蟻垤皆
被穿窬今營此陵制度卑狹用功省少望與天地相畢
永無後患其言非不丁寧切至也然竟不免溫韜之禍
太宗英武聰明過人甚遠而於此眷眷不忘何哉以此
知死生之際能超然無累者賢哲之所難也又云國家
府藏皆在目前與在陵內何異其詞尤陋得無為後世
達士所笑乎

右唐昭陵六馬贊初太宗以文德皇后之葬自為文刻石于昭陵又琢石象平生征伐所乘六馬為贊刻之皆歐陽詢八分書世或以為殷仲容書非是至諸降將名氏乃仲容書耳今附于卷末云

唐益州長史裴鏡民碑

右唐裴鏡民碑殷令名書令名與其子仲容皆以能書擅名一時而令名遺迹存者惟此碑耳筆法精妙不減歐虞惜不多見

唐溫彥博碑

右唐溫彥博碑歐陽公集古錄跋顏勤禮碑後云按唐

書溫大雅字彥弘弟彥博字大臨弟大有字彥將兄弟
義當一體而名大者字彥名彥者字大不應如此蓋唐
世諸賢名字可疑者多封德彝云名倫房玄齡云名喬
高士廉云名儉顏師古云名籀而皆以字行倫喬儉籀
在唐無所諱不知何避而行字余按顏之推家訓云古
者名終則諱之字乃可以為孫氏江南至今不諱字也
河北士人全不辯之名亦呼為字字固為字尚書王元
景兄弟皆號名人其父名雲字羅漢一皆諱之其餘不
足恠也又顏師古匡謬正俗載或問人有稱字而不稱
名者何也師古攷諸典故以稱名為是蓋當時風俗相

尚如此初無義理也然師古既立論以稱名為是而乃以字行殆不可曉也已

唐贈高穎禮部尚書詔

右唐贈高穎詔書貞觀十一年改葬有詔贈禮部尚書其事當載于史而隋書穎列傳唐書帝紀太宗實錄皆不載

唐河間元王碑

右唐河間元王孝恭碑按新唐書孝恭自宗正卿歷涼州都督晉州刺史貞觀初為禮部尚書以卒今以碑考之自宗正遷禮部尚書坐事免尋復舊任俄授梁州都

督改晉州刺史與司空無忘等同時冊拜觀州刺史世
世承襲復授光祿大夫禮部尚書蓋孝恭凡三為尚書
一免官一拜世襲刺史本傳皆不載而以梁州為涼者
亦誤也又唐初功臣皆云圖形凌煙閣而此碑乃作戢
武閣戢武之名不見于他書惟當時石刻數數有之豈
凌煙先名戢武而後改之邪

唐弘濟寺碑

右唐弘濟寺碑在今汾州據唐會要此碑李伯藥撰唐
太宗初即位下詔於建義以來交兵之處為義士凶徒
墮身戎陳者各建寺刻石命儒臣為銘凡七碑余所得

者汜水等慈呂州普濟幽州昭仁與此碑凡四而虞世
南褚遂良所撰今皆亡矣

唐段志玄碑

右唐段志玄碑以唐史考之多不合碑云公諱某字志
玄而其名已殘缺然史初不載其名也碑云鄒平人而
史云臨淄人碑云謚忠壯而史云謚忠肅舊史亦作忠
壯與碑合又碑云圖形戢武閣按唐史及諸書功臣圖
形皆云凌煙閣初余得河間元王碑云圖形戢武意謂
凌煙先名戢武後改之尔今得斯碑亦同由是益知前
言之不謬二碑皆當時所立不應差誤也

唐獨孤使君碑

右唐獨孤使君碑云君諱某字延壽而其名殘缺不可
辯延壽陁子也隋書外戚傳云陁二子延福延壽元和
姓纂亦云陁生延壽皆不著其名又姓纂云延壽封新
蔡公而碑云封新蔡縣開國男亦當以碑為正

唐晉祠銘

右唐晉祠銘太宗撰并書晉祠者唐叔虞祠也高祖初
起兵禱于叔虞祠至貞觀二十年太宗為立碑焉

唐相州刺史侯莫陳肅碑

右唐侯莫陳肅碑肅隋桂州總管頴之子也元和姓纂所

韋侯莫陳氏云其先後魏別部居庫斛真水周書云代
武川人世爲渠帥隋魏南遷爲侯莫陳氏余嘗得潁及
潁之孫涉墓誌皆云今劉姓系出漢楚元王交潁墓誌則
以爲父崇後周時賜以江涉墓誌則以爲崇王父豐後魏
時賜姓二說已自不同而肅碑乃云漢中山靖王勝之
後勝曾孫劭謀誅王莽不容避難於代因左言而命氏
改姓侯莫陳焉自古史傳所載容有異同今潁肅涉三
世歲月相接而碑誌所書自相乖戾如此皆莫知其孰
是豈其姓氏本出夷虜而唐初以族望相高故妄言出
于名胄以欺眩世俗初無所稽據乎不然殆不可考也已

唐孔穎達碑

右唐孔穎達碑于志寧撰世傳虞永興書據碑云穎達卒於貞觀二十一年時世南之亡久矣然驗其筆法蓋當時善書者規摹世南而為者也

唐太府卿李襲譽墓誌

右唐李襲譽墓誌唐史列傳載襲譽官閑甚略據墓誌云武德初拜太僕卿出為潞州總管尋徵拜太府卿而傳言高祖定長安授太府少卿者蓋傳誤傳言襲譽坐私憾杖殺番禾丞劉武并廢為民流泉州卒而墓誌不載疑諱之也

後周大冢伯瑱碑

右周唐瑾碑以後周書及北史列傳校之首尾皆抵牾
不合傳云字附璘而碑云字子玉傳云始仕為尚書
外郎而碑云釋褐貧外散騎侍郎傳云初封姑臧縣子
而碑云永昌子傳云為吏部尚書以父憂去職尋起令
視事而碑云為周太祖記室其年丁武公憂起復太子
舍人傳云為驃騎大將軍開府儀同三司進爵臨淄伯
轉吏部尚書于謹伐江陵以為元帥府長史而據碑為
吏部尚書皆在為驃騎開府及元帥長史已前又其改
封臨淄伯蓋為龍驤將軍時而其為開府乃進爵為公

傳云六官建授禮部中大夫而碑云授宗伯傳云出爲
蔡州刺史歷柘州硤州轉荊州總管府長史入爲吏部
中大夫歷御正納言中大夫久之除司宗中大夫兼內
史卒于位而碑云先爲柘州刺史乃遷蔡州授司宗御
正納言又轉荊州總管尋遷小宗伯乃薨其遷拜次第
不同如此傳云瑾嘗爲戶部尚書硤州刺史吏部中大
夫今據碑皆未嘗拜而柘州碑作柘碑云瑾嘗爲黃門
侍郎又爲散騎常侍尋領大著作脩國史及起居注又
爲侍中傳皆不載其卒也傳云贈小宗伯而碑云贈華
州刺史傳云謚曰方而碑云謚曰懿碑于志寧撰身觀

中其孫皎所立後周書北史皆唐初脩距瑾之卒歲月未遠而顛倒錯謬如此然其官爵名字子孫不應有誤皆當以碑為據也

隋皇甫誕碑

右隋皇甫誕碑余嘗得誕墓誌又符此碑以攷北史及隋書列傳傳云誕字玄慮而碑誌皆作玄憲傳云隋高祖受禪為兵部侍郎數年出為魯州長史開皇中復為比部刑部刑曹二侍郎遷治書侍御史為河南道大使及還奏事稱旨令判大理少卿明年遷尚書右丞以碑誌參攷誕自司徒主簿出授長史俄除益州總管府司

法徵授比部侍郎蓋未嘗拜兵部而其爲河北河南安撫大使乃任右丞時皆史家之謬惟墓誌稱誕嘗爲司徒主簿而碑不載傳與墓誌皆云爲魯州長史而碑作廣州則疑碑之脫漏墓誌乃葬時所述然碑亦貞觀中其子無逸追建不應差謬而不同何也

金石錄卷第二十三

金石錄卷第二十四

跋尾十四 唐

唐益州學館廟堂記

唐萬年宮碑陰題名

唐薛收碑

唐崔敦禮碑

唐贈左僕射楊達碑

唐李靖碑

唐辨法師碑

唐蘭陵長公主碑

唐清河公主碑

唐趙弘智碑

唐登封紀號文

唐司空元太常伯竇德玄碑

唐于志寧碑

唐弘文館學士顧君墓誌

唐碧落碑

唐興昔亡單于阿史那彌射碑

唐阿史那忠碑

唐明徵君碑

唐黎尊師碑

唐李勣碑

唐陽翟侯夫人陸氏墓誌

唐少姨廟碑

唐啓母廟碑

唐房玄齡碑

唐高士廉塋兆記

唐益州學館廟堂記

右唐益州學館廟堂記成都縣令顏有意書撰人題法
曹陳王文學太子詹事符詔弘文館陵州長史而姓名
殘缺不可辨集古錄直以為有意撰非也碑陰載當時

官僚姓名後人題云此記賀遂亮撰未知果是否記文
叙述前世遺跡考究同異文詞古雅甚可喜也

唐萬年宮碑陰題名

右唐萬年宮碑陰者高宗自為萬年宮碑詔宰相而下
皆題名于其陰余每覽此碑見長孫無忌褚遂良許敬
宗李義甫同時列名未嘗不掩卷太息以為善惡如水
火決不可同器惟人主能辨小人而遠之然後君子道
長而天下治若俱收並用則小人必得志小人得志則
君子必被其禍如無忌遂良是已然知人帝堯所難非
所以責高宗也

唐薛收碑

右唐薛收碑文字殘缺其可讀處以唐史校之無甚異同惟收之卒謚曰懿而史不書尔又收之子元超據唐史及此碑皆云名元超而楊炯盈川集載炯所為元超行狀乃云名振字元超蓋唐初人多以字為名耳

唐崔敦禮碑

右唐崔敦禮碑按新唐史列傳云敦禮字安上而宰相世系表則云名安上字敦禮今此碑所書與表合然舊史及碑皆言敦禮本名元禮高祖為改名焉其孫兢墓誌亦云名敦禮蓋疑其以字行耳又世系表其末載崔

氏爲宰相者二十餘人而獨不著敦禮乃其闕漏也

唐贈左僕射楊達碑

右唐贈左僕射楊達碑達觀王雄弟也煬帝時官至納言卒贈吏部尚書唐顯慶中以武后外祖父加贈左僕射官爲之立碑以隋書列傳攷之時有異同傳云字士達而碑云字叔莊傳云年六十二而碑云年六十五皆當以碑爲正又傳云謚恭而碑云謚懿余集錄有李嶠所撰武后母墓碑亦云謚爲恭與傳合未知孰是也

唐李靖碑

右唐李靖碑集古錄云靖之封衛國公也授濮州刺史

蓋太宗以功臣為世襲刺史後雖不行史宜書而不書者闕也余按新史長孫無忌傳載無忌以下授世襲刺史者凡十四人姓名具存蓋其事已見于他傳則於本傳似不必重載也

唐辨法師碑

右唐辨法師碑薛純陀書歐陽公集古錄云純陀太宗時人其書有筆法意其當時必為知名士而今世人罕知者然亦不傳于世集古所得純陀書祇此而已余按法書要錄云薛純陀學歐草微傷肥鈍亦通之亞也然則純陀當時真知名矣余又得純陀八分書比于碑歐

陽公所未嘗見也與純陀同時有薛純唐太宗命書砥
柱銘者其筆法與純陀絕相類疑即一人蓋唐初時人
名姓多如此耳

唐蘭陵長公主碑

右唐蘭陵長公主碑李義甫撰據唐書列傳公主太宗
第十二女而碑云第十九女蓋傳誤也

唐清河公主碑

右唐清河公主碑公主太宗女也碑云下嫁程知節之
子麴亮知節碑及唐史知節列傳元和姓纂所載皆同
惟公主列傳作懷亮非是唐史一書而首尾自相乖戾

者甚衆非特此也

唐趙弘智碑

右唐趙弘智碑云弘智字處仁而史不載又云自太子舍人為吏部員外郎遷國子博士檢校吏部郎中尋為越王府長史兼檢校吏部侍郎遂轉黃門侍郎舊史亦云累遷而新史直云繇太子舍人拜黃門侍郎尔又弘智為國子祭酒嘗領東宮賓客而新舊史亦皆不載

唐登封紀號文

右唐登封紀號文凡兩碑皆高宗自撰并書其一大字磨崖刻于山頂其字差小立于山下然世頗罕傳政

和初余親至泰山得此碑入錄焉

唐司元太常伯竇德玄碑

右唐竇德玄碑以唐史本傳考之其事多合惟德玄為御史大夫攝吏部禮部度支三尚書遂遷大司憲史皆不載又其弟德遠史云封樂安男而碑作樂平皆當以碑為正

唐于志寧碑

右唐于志寧碑以考唐史列傳其徵時所歷官吏多不書今亦不復錄錄其尤著者碑云大業十年為清河縣長而傳云為冠氏長碑云自中書侍郎遷兵部授蒲州

刺史不赴後為衛尉卿判太常卿事以本官兼雍州別
駕遷禮部尚書而史皆不載史云自侍中拜尚書左僕
射同中書門下三品頃之兼太子少師遷太傅顯慶四
年以老乞骸骨詔解僕射更拜太子太師仍同三品今
以碑考之其初拜僕射也未嘗領中書門下三品至罷
僕射乃為同中書門下參謀朝政皆史家之誤又案百
官志唐初宰相有參議朝政參預朝政參知政事其後
有同中書門下三品同平章事永淳中遂以平章事入
銜而獨無參謀朝政之名蓋惟見于此尔

右唐顧君墓誌已殘缺其前一段以事考之蓋顧君也
後高宗朝為弘文館學士司文郎中卒名姓附見唐書
令狐德棻傳其子琛仕武后為宰相今此誌但云第
六子琬等而無琮豈當時官未顯故不載歟

唐碧落碑

右唐碧落碑大篆書其詞則唐宗室黃公譔所述或云
陳遺玉書或云譔自書皆莫可知李肇及李漢並言李
陽冰見此碑褻徊數日不去又言陽冰自恨其不如以
槌擊之今缺處是也此說恐不然陽冰嘗自述其書以
謂斯翁之後直至小生於他人書蓋未嘗有所推許唐

人以大篆當時罕見故妄有稱說耳其實筆法不及陽
冰遠甚也

唐興昔亡單于阿史那彌射碑

右唐阿史那彌射碑彌射本西突厥嘗歸朝後伐龜茲
為蘇海政所殺舊唐史紀彌射事甚詳多與碑合而新
史所書甚略如高宗朝冊為崑陵都護興昔亡單于皆
不載碑云單于諱某字彌射而闕其名不書史但言名
彌射豈作碑者為緣飾之乎

唐阿史那忠碑

右唐阿史那忠碑唐書列傳云忠尚宗室女定襄縣主

始詔姓獨著史今此碑當時所立題云阿史邲府君之碑而元和姓纂亦云阿史邲氏開元中改爲史疑傳誤也唐太宗親撥隋亂即位未幾遂致太平其好賢樂善蓋出天性故一代豪傑皆樂爲之用如忠之徒出於降虜亦皆立勲本朝著名後代雖云太宗天姿英睿絕人甚遠至於輸忠盡節衆賢之助亦多矣嗚呼盛哉

唐明徵君碑

右唐明徵君碑徵君者梁明山賓也高宗朝其裔孫崇儼以方伎進故立此碑舊唐史言高宗自製文而書之非也蓋高宗撰文高正臣書耳

唐黎尊師碑

右唐黎尊師碑題云盧字昇字照隣撰按唐史盧照隣字昇之與此碑不合蓋唐初人多以字爲名尔至以字昇爲昇之則疑史之誤

唐李勣碑

右唐李勣碑按唐史太宗屬疾出勣爲疊州都督高宗立召授檢校洛州刺史今以碑考之其除洛州乃在太宗朝高宗即位授開府儀同三司又新舊史皆云勣年八十六而碑云年七十六碑高宗自撰其所書官爵年壽皆可信無疑也

唐陽翟侯夫人陸氏墓誌

右唐陽翟侯夫人陸氏墓誌陽翟侯者褚遂賢也元和姓纂
及唐書宰相世系表載遂賢一子兼藝為永州司功今
此誌云二子兼善兼愛而無兼藝兼善兼愛二子姓纂
唐史漏落容有之惟兼藝墓誌不書者何也豈非唐表
誤乎

唐少姨廟碑

右唐少姨廟碑楊炯撰云少姨廟者則漢書地理志崇
高少室之廟也其神為婦人像者則故老相傳云啓母
塗山氏之妹也余按淮南子云塗山氏化為石而生啓

其事不經固已難信今又以少姨為塗山氏之妹廟而祀之其為淺陋尤甚蓋俚俗所立淫祀也炯既載之于碑又遂以為漢書所謂少室之廟者何其陋哉

唐啓母廟碑

右唐啓母廟碑崔融撰按淮南子云禹治鴻水通輶轅山化為熊塗山氏見之慙而去至嵩高山下化為石方生啓禹曰歸我子石破北方而啓生其說可謂恠矣然漢武帝幸緱氏至中嶽見夏后啓母石列于詔書則固已信之矣其後郭璞注山海經顏師古注漢書皆具載其語而融又文其事于碑流俗安得不惑乎自古荒誕

之士喜為奇辭悅說以欺世眩俗學士大夫能卓然不惑者蓋鮮如啓母化為石伊尹之母化為桑事尤不經難信然繇古訖今未有非之者也嗚呼此君子所以惡攻乎異端也歟

唐房玄齡碑

右唐房玄齡碑文字磨滅斷續不可考究惟其名字僅存其後題修國史河南公而名姓殘缺者褚遂良也按舊唐史云玄齡名喬字玄齡而新史乃云名玄齡字喬今碑所書與新史合惟宰相世系表又云玄齡字喬松者不知何所據也

唐高士廉瑩兆記

右唐高士廉瑩兆記唐史及元和姓纂皆云士廉父名
勵而北史作勸今此碑與北史合蓋唐史及姓纂轉寫
誤尔碑許敬宗撰趙模書模字畫甚工蓋貞觀中太宗
命臨蘭亭序者

金石錄卷第二十四

